

朔方備乘

朔方備乘卷第三十二

傳二

周齊隋唐北徼諸國傳敘

突厥

西突厥

阿史那賀魯

突騎施

驅度寐

拔悉彌

流鬼

鐵勒

薛延陀

同紇

僕骨

同羅

都波

拔野古

多濫葛

斛薛

阿跋

鞠國

俞杓

大漢

白霄

骨利幹

結骨

駁馬

鬼國

鹽漠念

大食

附載

臣秋濤謹按突厥初盛於周齊之間再盛於隋唐之際北盡北海鐵勒諸部西盡西海可薩諸部凡今俄羅斯全境悉歸統轄洵朔漠之強國也遇唐太宗之賢英衛之將略一舉殘破遂不復振而鐵勒諸部各起紛爭薛延陀回紇相繼稱汗受唐封冊所據皆在色楞格河一帶古匈

奴左地是也西突厥分據古匈奴右地屢起屢  
蹶賀魯突騎施諸部並爲唐所摧殄皆北徼掌  
故不可不書至僕骨等部地在東偏結骨等部  
地在西偏駁馬等部北負冰海皆今俄羅斯之  
地自突厥薛延陀敗後咸附唐請更設都督刺  
史等官太宗所以稱天可汗也大食國在西域  
然其後亦併有今俄羅斯南境地故附著焉

突厥傳

臣秋濤謹按突厥地北至  
北海全有今俄羅斯境

突厥之先蓋匈奴之別種姓阿史那後魏末其

首帥土門部落稍盛始至塞上通中國發兵擊  
蠕蠕大破之遂自號伊利可汗其季子俟斤立  
爲木杆可汗勇而多智務于征伐西破嚙噠東  
走契丹北并契骨

臣秋濤謹按契骨卽  
堅昆今俄羅斯地

威服塞

外諸國其地東自遼海以西至西海萬里南自  
沙漠以北至北海五六千里皆屬焉俟斤旣盛  
累破蠕蠕蠕蠕主奔關中俟斤使於西魏請得  
而甘心宇文泰執蠕蠕主及其部落三千人付  
突厥使者殺之俟斤死捨其子大邏便而立其

弟是爲他鉢可汗中國憚其強猛周齊爭結婚  
姻傾府庫事之仍歲給繒綵十萬段他鉢益驕  
曰使我在南兩兒孝順何患貧也他鉢卒國中  
立其子菴邏爲嗣大邏便心不服每遣人詈辱  
之菴邏不能制國中相與議曰四可汗子攝國  
最賢因迎立之爲大可汗號沙鉢略可汗居都  
斤山菴邏降居獨洛水稱第二可汗以大邏便  
爲阿波可汗還領所部旣而沙鉢略忌阿波驍  
悍因襲擊大破之阿波西奔達斯可汗達斯者

名玷厥沙鉢略之從父也舊爲西面可汗旣而遣阿波率兵而東與沙鉢略相攻於是分爲東西部互相侵掠連兵不已沙鉢略旣爲達斯所困又東畏契丹遣使詣隋告急請將部落度漠南寄居白道川詔許之其子雍虞閭立是爲頡伽施多那都藍可汗隋平陳後以陳叔寶屏風賜大義公主公主沙鉢略妻周千金公主也主心恒不平因書屏風爲詩敘陳亡以自寄隋聞惡之時沙鉢略子曰染干號突利可汗居北方

遣使求婚隋令裴矩謂曰當殺大義公主方許  
婚突利譖之都藍因發怒遂殺公主于帳隋妻  
以宗女安義公主突利以故南徙度斤舊鎮錫  
賚優厚雍虞閭怒曰我大可汗也反不如染干  
於是與玷厥舉兵攻染干染干夜以五騎歸朝  
隋拜染干爲意利珍豆啓民可汗於朔州築大  
利城以居之部落歸者甚衆雍虞閭又擊之遂  
遷于河南在夏勝二州之間雍虞閭旋爲部下  
所殺啓民遂有其衆大業三年煬帝幸榆林啓



民來朝帝親巡雲中泝金河而東北幸啟民所  
居明歲啟民卒其子吐吉立是爲始畢可汗十  
一年八月始畢率其種落入寇圍帝于雁門援  
兵至始畢引去隋末亂離華人多往依之薛舉  
竇建德王世充劉武周梁師都李軌高閔道之  
徒雖僭尊號皆稱臣受其可汗之號東自契丹  
室韋西盡吐谷渾高昌諸國皆臣之控弦百萬  
唐起義太原使劉文靜聘其國引以爲援武德  
二年始畢卒其子室鉢苾以年幼不堪嗣位立

爲泥步設使居東偏直幽州之北立其弟侯利  
弗設是爲處羅可汗迎隋蕭后及齊王暕之子  
正道於竇建德所因立爲隋王奉隋後隋人在  
北者悉隸之行隋正朔置百官居定襄衆萬人  
明年處羅死其弟咄苾嗣是爲頡利可汗頡利  
始爲莫賀咄設牙直五原北薛舉陷平涼與連  
和唐遣光祿卿宇文歆賂之使與舉絕隋五原  
太守張長遜以所部五城附突厥歆并說還五  
原地皆見聽太子建成議廢豐州并割榆中地

於是處羅子郁射設以所部萬帳入處河南以靈州爲塞頡利以什鉢苾爲突利可汗使居東七年頡利與突利兵並起自源州連營而南太宗北討軍至幽州可汗萬騎奄至舉軍失色太宗乃親率百餘騎馳詣陣前告之曰國家於突厥無負何爲深入我秦王也故來一決可汗若自來我當與可汗兩人獨戰若或兵馬總來我惟百騎相禦耳頡利弗之測笑而不對太宗又馳騎語突利曰爾往與我盟急難相救今將兵

來何無香火情也亦宜早出一決勝負突利亦  
不對頡利見兵少又聞與突利語陰相忌乃不  
欲戰因遣使請和許之貞觀元年陰山以北薛  
延陀回紇拔曳固等十餘部皆相率叛頡利遣  
突利討之不勝輕騎走頡利怒拘之十餘日突  
利由是怨憾內欲背之三年頡利遣使奏言與  
突利有隙請擊之詔秦武通以并州兵馬隨便  
應接明年薛延陀自稱可汗於漠北遣使求貢  
方物頡利始稱臣詔兵部尙書李靖擊之於馬

邑頡利走九俟斤以衆降拔曳固僕骨同羅諸  
部霫奚渠長皆來朝於是詔李靖出定襄道并  
州都督李世勣出通漢道左武衛大將軍柴紹  
出金河道靈州大都督任城王道宗出大同道  
幽州都督衛孝節出恒安道營州都督薛萬徹  
出暢武道並受靖節度以討之突利及都射設  
蔭奈特勒並帥所部來奔四年正月李靖進屯  
惡陽嶺夜襲定襄頡利驚擾因徙牙於磧口大  
酋蘇密等以隋蕭后及楊正道來降頡利計窘

走保鐵山靖襲擊之盡獲其衆頡利得千里馬  
獨奔沙鉢羅行軍副總管張寶相禽之其國遂  
亡復定襄恒安地唐斥境至大漠矣伊吾城之  
長素臣突厥舉七城以降因以其地爲西伊州  
頡利之亡其下或走薛延陀或入西域而來降  
者尙十餘萬自幽州屬靈州建順佑化長四州  
爲都督府剖頡利故地左置定襄都督右置雲  
中都督二府統之乃以突利可汗爲順州都督  
令率其下就部初頡利之立用次第爲延陀設

主延陀部以突利主契丹靺鞨部東方之衆皆屬焉突利歛取無法下不附故薛延陀奚霫等皆內屬突利入朝拜右衛大將軍北平郡王及爲都督入朝道病卒子賀邏鶻嗣突利弟結社率以即將宿衛十三年從幸九成宮陰結部落得四十餘人並擁賀邏鶻相與夜犯御營折衝孫武開率兵奮擊尋皆斬之詔原賀邏鶻流於嶺外於是羣臣多言處突厥中國非是乃立阿史那思摩爲乙彌泥熟俟利苾可汗賜氏李樹

牙河北悉徙突厥還故地思摩者頡利族人也  
太宗令統頡利舊部落舉磧以北延陀主之磧  
以南突厥保之其地南大河北白道居三年不  
能得其衆思摩遂輕騎入朝殘衆稍稍南渡河  
分處勝夏二州車鼻可汗乃盜有其地車鼻者  
世爲小可汗頡利敗時諸部欲君長之曾薛延  
陀稱可汗乃往歸焉其爲人沈果有智數頗爲  
衆所附延陀畏逼將殺之乃率所部遯去竄金  
山之北三垂斗絕惟一面可容車騎壤土夷博



卽據之勝兵三萬自稱乙注車鼻可汗距長安

萬里西葛邏祿北結骨皆并統之

臣秋濤謹案結骨卽前契

骨是車鼻亦統俄羅斯矣

二十一年遣子沙鉢羅特勒獻方

物且請身自入朝太宗遣使徵之竟不至太宗

大怒遣右驍衛卽將高偁發回紇僕骨兵擊之

師次阿息山部落不肯戰車鼻攜愛妾從數百

騎走追至金山獲之送于京師處其餘衆于鬱

督軍山詔建狼山都督府統之初其子羯漫陀

泣諫車鼻請歸國不聽乃遣子菴鑠入朝後來

降拜左屯衛將軍建新黎州使領其衆於是突厥盡爲封疆臣矣始置單于都護府領狼山雲中桑乾三都督蘇農等二十四州瀚海都護府領金微新黎等七都督仙萼賀蘭等八州卽擢領酋爲都督刺史麟德初改燕然爲瀚海都護府領回紇徙故瀚海都護府於古雲中城號雲中都護府磧以北蕃州悉隸瀚海磧以南蕃州隸雲中後改雲中府爲單于大都護府高宗東封泰山狼山都督葛邏祿叱利等三十餘人皆

從至泰山下勒名於封禪之碑自永徽以後三十年北方無戎馬警調露初單于府大酋溫傳奉職二部落反立阿史那泥熟匐爲可汗二十四州並應之高宗遣鴻臚卿蕭嗣業等討之反爲所敗更拜禮部尙書裴行儉爲定襄道行軍大總管率太僕少卿李思文等討之明年行儉戰黑山大破之其下斬泥熟匐以降禽溫傳奉職還餘衆保狼山永隆中溫傳部又迎頡利族于伏念於夏州走度阿立爲可汗諸部響應復

詔行儉討之行儉兵壁代之陁口縱反間因擊  
敗之伏念益北留輜重妻子保金牙山行儉遣  
部將掩得其輜重乃北走保細沙行儉遂虜伏  
念送京師斬東市永淳元年骨咄祿又反骨咄  
祿者頡利之疎族伏念敗骨咄祿嘯聚亡散保  
總材山又治黑沙城有衆五千盜九姓畜馬稍  
强大乃自立爲可汗時單于府檢校降戶部落  
阿史那元珍者爲長史王本立所囚會骨咄祿  
來寇元珍請諭還諸部贖罪許之至卽降骨咄

祿與爲謀遂以爲阿波達干悉屬以兵乃寇單于府北鄙垂拱間連寇朔代掠吏士右鷹揚衛大將軍黑齒常之與戰黃花堆大破之追奔四十餘里逃走磧北天授初骨咄祿死弟默啜自立爲可汗契丹首領李盡忠等反默啜請擊賊自效乃引兵擊契丹盡獲其家口酋長敗潰武后嘉其功冊爲特進頡跌利施大單于立功報國可汗初咸亨中突厥內屬者分處豐勝靈夏朔代間謂之河曲六州降戶至是默啜索此降

戶兼請粟田種十萬斛農器三千具鐵數萬斤  
武后初不許納言姚璹等建議與之乃歸粟器  
降人數千帳默啜寢強詔淮南王武延秀就納  
其女爲妃遣右豹韜衛大將軍閻知微攝春官  
尙書持節護送默啜猥曰我女擬嫁與李家天  
子兒今將武家兒來我世降附李家今聞惟有  
兩兒在我當立之卽囚延秀等妄號知微爲可  
汗自將十萬騎南向破蔚州飛狐進殘定州后  
大怒改默啜爲斬啜尋又圍逼趙州進攻相州

時中宗還自房陵爲皇太子拜行軍大元帥以  
納言狄仁傑爲副默啜聞之取趙定所掠男女  
八九萬悉阮之出五回道去默啜兵與頡利時  
略等地縱廣萬里諸蕃悉往聽命後立子匐俱  
爲小可汗是時連歲寇邊景龍二年三月張仁  
愿於河北築三受降城自是突厥不得度山放  
牧朔方無寇掠默啜西滅婆葛遂役屬契丹奚  
因虐用其下部落怨叛十姓左五咄陸右五弩  
失畢俟斤皆請降葛邏祿胡屋鼠尼施三姓大

漠都督特進朱斯陰山都督謀落匐雞元池都督蹋實力胡鼻率衆內附詔處其衆于金山以右羽林大將軍薛納爲涼州鎮軍大總管屯涼州右衛大將軍郭虔瓘爲朔州鎮軍大總管屯并州默啜壻高麗莫離支高文簡與蹀跌都督思太吐谷渾大酋慕容道奴等合萬餘帳相踵款邊詔納之阿南默啜討九姓戰磧北九姓潰思結等部來降默啜又北討拔曳固戰獨樂河拔曳固大敗默啜輕歸不設備道大林中拔曳



固殘衆突出擊默啜斬之乃與入藩使郝靈佺  
傳默啜首至京師骨咄祿子闕特勒合故部攻  
殺小可汗立其兄默棘連是爲毗伽可汗是時  
奚契丹相率款塞突騎施蘇祿自立爲可汗突  
厥部衆多貳默棘連乃召默啜時衙官燉欲谷  
爲謀主初默啜死闕特勒盡殺其用事臣惟燉  
欲谷者以女爲默棘連可敦獨免俄而降戶跋  
跌思太等自河曲叛歸開元八年冬御史大夫  
王唆爲朔方道大總管奏請西徵拔悉密東發

奚契丹兩蕃期以明年秋引朔方兵集稽落水  
上分道掩其牙默棘連大恐燉欲谷曰拔悉密  
今在北庭與兩蕃東西相去極遠勢必不合王  
駿兵馬亦必不能來卽皆能來我當前三日悉  
衆北徙彼糧竭自去拔悉密輕而好利必先至  
擊之可取也俄而拔悉密果引衆逼突厥牙知  
駿等不至乃引却突厥欲擊之燉欲谷曰此衆  
去家千里必將死戰不如躡之距北庭二百里  
燉欲谷分兵間道先掩北庭因縱擊拔悉密之

衆悉禽之還出赤亭掠涼州突厥遂大振盡有  
默啜餘衆明年因乞和是時天子東巡泰山默  
棘連遣大臣阿史那頡利發入獻遂從封禪吐  
蕃以書約與連和鈔邊默棘連封上其書天子  
嘉之引使者梅錄啜宴于紫宸殿詔朔方西受  
降城許互市二十二年默啜連爲梅錄啜所毒  
忍死殺梅錄啜夷其種乃卒子伊然可汗嗣二  
十八年卒于登利可汗年初其母婆匄與小臣  
飫斯達干亂遂預政諸部不協登利從父分掌

東西兵號左右殺勁兵皆屬焉可汗與其母誘  
斬右殺奪其兵左殺懼勒兵攻登利殺之左殺  
者判闕特勒也復立毗伽可汗子俄爲骨咄葉  
護所殺立其弟又殺之葉護乃自立爲可汗天  
寶初其大部同紇葛邏祿拔悉密並起攻葉護  
殺之國人奉判闕特勒子爲烏蘇米施可汗拔  
悉密等三部共攻之殺烏蘇米施其弟白眉特  
勒鶻隴匐立是爲白眉可汗於是突厥大亂國  
人推拔悉密酋爲可汗詔朔方節度王忠嗣以

兵乘其亂抵薩阿內山擊其左阿波連千十一  
部破之獨其右未下而回紇葛邏祿殺拔悉密  
可汗奉回紇骨力裴邏定其國毗伽可汗妻婆  
匄及骨咄祿可敦率衆自歸天子御花萼樓宴  
羣臣賦詩美其事始突厥國于後魏大統時至  
是滅後或朝貢皆舊部九姓云其地盡入回紇

西突厥傳

臣秋濤謹案西突厥地北至今  
俄羅斯之多木斯科西至今俄

羅斯之端  
戈薩斯境

西突厥者始爲突厥右地及木杆可汗之子大

邏便爲阿波可汗始自爲國

說詳突厥傳

其國居烏

孫之故地東至突厥國西至雷翥海南至疎勒

北至瀚海在京師西北七千里自焉耆國西北

七日行至其南庭

臣秋濤謹案今由哈喇沙爾西北至空格斯六百里則今

之空格斯卽西突厥南庭地

自南庭又正北八日行至其北

庭

臣秋濤謹案今由空格斯北至伊犁四百五十里又北三百餘里當卽西突厥北庭地西

域志引唐書誤以爲在焉耆正北八日行非也

鐵勒龜茲及西域諸國

皆歸附之其人雜有都陸及弩矢畢葛邏祿處

月處密伊吾等諸種風俗大抵與突厥同惟言

語微異其官有葉護有設有特勒常以可汗子弟及宗族爲之又有乙斤屈利啜聞洪達頡利發吐屯侯斤等官皆世襲其位大邏便旋爲處羅可汗所擒其國立鞅素特勒之子是爲泥利

可汗至其子達漫號泥掘處羅可汗

與北突厥處羅可汗

號同非一人也

其母向氏本中國人生達漫而泥利卒

而向氏又嫁其弟婆實特勒隋開皇末婆實與向氏詣長安處羅可汗居無常處然多在烏孫故地立小可汗分統所部一在石國北以制諸

胡一居龜茲北其地名應婆每五月八月相聚  
祭神煬帝大業六年帝將西討吐谷渾遣侍御  
韋節召處羅會于大斗拔谷其國人不從處羅  
謝使者辭以故適會其酋長射匱使求婚裴矩  
因奏曰處羅不朝自恃强大臣請以計弱之分  
裂其國則易制也射匱之祖父世爲可汗君臨  
西面今聞其失職附隸于處羅故遣使來以結  
援耳願厚禮其使拜爲大可汗突厥勢分兩從  
我矣帝從之遂召其使者言處羅不順之意稱



射匱有好心吾將立爲大可汗令發兵誅處羅  
然後當爲婚也帝取桃竹白羽箭一枝以賜射  
匱因謂之曰此事宜速疾如箭也使返路經  
處羅處羅愛箭將留之使者譎而得免射匱聞  
之大喜興兵襲之處羅大敗棄妻子將左右數  
千騎東走遁于高昌東保特羅漫山高昌王麴  
伯雅上狀帝遣裴矩將向氏親要左右往曉諭  
之遂入朝詔留其羸弱萬餘口令其弟闕達設  
牧畜會寧郡處羅可汗隋煬帝大業中與特勒

大奈入朝仍從煬帝征高麗賜號爲曷薩那可  
汗遇江都之亂從宇文化及至河北化及敗歸  
唐封歸義郡王俄貢大珠于高祖上勞之曰珠  
信爲寶王但赤心珠無所用不受自處羅朝隋  
後射匱遂有其地處羅旣先與始畢有隙及在  
京師始畢遣使請殺之高祖不許羣臣諫曰若  
不與則是存一人而失一國也後必爲患遲廻  
久之不得已乃引曷薩那可汗於內殿與縱酒  
旣而送至中書門下省縱北突厥使殺之太宗

卽位令以禮改葬初曷薩那之朝隋被留也其國人遂立射匱爲可汗始開土宇東至金山西臨西海自玉門以西諸國皆役屬之遂與北突厥爲敵乃建庭於龜茲北三彌山尋卒弟統葉護可汗代立勇而有謀善攻戰北并鐵勒西拒波斯南接罽賓悉歸之控弦數十萬霸有西域據舊烏孫之地又移庭於石國北千里其西域諸國王悉授頡利發并遣吐屯一人監統之督其征賦西戎之盛未有也武德三年遣使貢條

支巨卵時北突厥作患高祖厚加撫結與之并  
力以圖北蕃統葉護許以五年冬大軍當發頡  
利可汗聞之大懼復許統葉護通和無相征伐  
統葉護尋遣使來請婚高祖謂侍臣曰西突厥  
去我懸遠急疾不能得力今來請婚計將安在  
封德彝對曰當今之務莫若遠交而近攻正可  
權許其婚以威北狄待三數年後中國全盛徐  
思其宜高祖許之婚令高平王道立至其國統  
葉護大悅遇頡利可汗頻歲入寇西蕃路梗由

是未果爲婚貞觀元年遣眞珠統俟斤與道立  
來獻萬釘寶鈿金帶馬五千疋時統葉護自負  
其強無恩於國部落咸怨葛羅祿種多叛之頡  
利可汗不欲中國與之和親數遣兵入寇又遣  
人謂統葉護曰汝若迎唐家公主要須經我國  
中而過統葉護患之未克婚爲其伯父所殺而  
自立是爲莫賀咄俟屈利毗可汗初統葉護令  
伯父分統突厥種類爲小可汗及此自稱大可  
汗國人不附弩矢畢部共推泥熟莫賀設爲可

汗泥熟不從時統葉護之子咥利特勒避莫賀咄之難亡在康居泥熟遂迎而立之是爲乙毗沙鉢羅肆葉護可汗連兵不息俱遣使來朝各請婚於我太宗不許諷令各保所部無相征伐其西域諸國及鐵勒先役屬於西突厥者悉叛之國內虛耗肆葉護旣是舊主之子爲衆心所歸其西面都陸可汗及莫賀咄可汗二部豪帥多來附之又興兵以擊莫賀咄莫賀咄大敗遁於金山尋爲咄陸可汗所殺國人乃奉肆葉護

爲大可汗肆葉護可汗立大發兵北征鐵勒薛  
延陀逆擊之反爲所敗肆葉護性猜狠信讒無  
統馭之略有乙利可汗者於肆葉護功最多由  
是授小可汗以非罪族滅之羣下震駭莫能自  
固肆葉護素憚泥熟陰欲圖之泥熟遂適焉耆  
其後設卑達官與突厥弩矢畢二部豪帥潛謀  
擊之肆葉護以輕騎遁於康居尋卒國人迎泥  
熟於焉耆而立之是爲咄陸可汗亦稱大度可  
汗其父莫賀設本隸統葉護武德中常至京師

時太宗居藩務加懷輯與之結盟爲兄弟旣被  
推爲可汗遣使詣闕請降太宗賜以名號及鼓  
纛貞觀七年遣鴻臚寺少卿劉善因至其國冊  
爲可汗明年泥熟卒其弟同俄設立是爲沙鉢  
羅咥利失可汗以貞觀九年上表請婚獻馬五  
百匹朝廷唯厚加撫慰未許其婚俄而其國分  
爲十部每部令一人統之號爲十設每設賜以  
一箭故稱十箭焉又分十箭爲左右廂各置五  
箭其左廂號爲五咄陸部落置五大啜管一箭



右廂號爲五弩矢畢置五大俟斤管一箭其後  
或稱一箭爲一部落大箭頭爲大首領五咄陸  
部落居碎葉以東五弩矢畢部落居於碎葉以  
西自是總號爲十姓部落唃唃利失旣不爲衆所  
歸部衆攜貳爲其統吐屯所襲麾下亡敗唃唃  
利失以左右百餘騎拒之戰數合統吐屯不利而  
去唃唃利失奔其弟步利設與保焉耆其阿悉吉  
闕俟斤與統吐屯等召國人將立欲谷設爲大  
可汗以唃唃利失爲小可汗統吐屯爲人所殺欲

谷設兵又爲其俟斤所破唃唃利失復得其故地  
弩矢畢處月處密等並歸唃唃利失十二年西部  
竟立欲谷設爲乙毗咄陸可汗與唃唃利失中分  
其國自伊列河以西屬咄陸以東屬唃唃利失咄  
陸可汗又建庭於烏鏃曷山西謂之北庭白厥  
越失拔悉彌駁馬結骨火燾觸木昆諸國皆臣  
之十三年唃唃利失爲吐屯俟利發與欲谷設通  
謀作難唃唃利失窮蹙奔於鏃汗而死弩矢畢部  
落酋帥迎唃唃利失弟伽那之子薄布特勒而立

之是爲乙毗略沙鉢羅葉護可汗乙毗可汗旣  
立建庭於雖合水北謂之南庭東以伊列河爲  
界自龜茲鄯善且末吐火羅焉耆石國史國何  
國穆國康國皆受其節度累遣使朝貢太宗降  
璽書慰勞貞觀十五年令左領軍將軍張大師  
冊授焉賜以鼓纛於時咄陸可汗與葉護頻相  
攻擊會咄陸遣使詣闕太宗諭以敦睦之道咄  
陸兵衆漸強西域諸國復來歸附未幾咄陸攻  
殺葉護并其國弩矢畢諸姓不服皆叛之咄陸

復率兵擊破吐火羅遣兵寇伊州安西都護郭  
孝恪率輕騎二千自烏骨邀擊敗之咄陸又遣  
處月處密等圍天山縣孝恪又擊走之孝恪乘  
勝進據處月俟斤所居之城追奔及於遏索山  
斬首千餘級降其處密之衆而歸咄陸初以泥  
熟噉自擅取而斬之以徇尋爲泥熟噉部將胡  
錄屋所襲衆多亡逸其國大亂貞觀十五年部  
下屈利噉等謀欲廢咄陸各遣使詣闕請立可  
汗太宗遣使齎璽書立賀咄乙毗可汗之子是

爲乙毗射匱可汗旣立乃發弩矢畢兵就白水  
擊咄陸大敗之咄陸自知不爲衆所附乃西走  
吐火羅國中國使人先爲咄陸所拘者射匱悉  
以禮資送歸長安復遣使貢方物請賜婚太宗  
許之令割龜茲于闐疎勒朱俱波慈嶺等五國  
以充聘禮及賀魯之叛射匱部落爲其所并

阿史那賀魯傳

臣秋濤謹案賀魯所據地  
由碎葉至石國乃俄羅斯

始起地其役屬諸國  
直至西海故列於此

阿史那賀魯者曳步利設射匱特勒之子也咄

陸可汗立賀魯爲葉護居於多邏斯川在西州  
直北千五百里統處月處密姑蘇葛邏祿畢矢  
五姓之衆其後咄陸西走吐火羅國射匱可汗  
遣兵迫逐賀魯不常厥居貞觀二十三年乃率  
其部落內屬詔居庭州尋授左騎衛將軍瑤池  
都督永徽二年與其子啞運率衆西遁據咄陸  
可汗之地總有西域諸部建牙於雙河及千泉  
自號沙鉢羅可汗統攝咄陸弩矢畢十姓其咄  
陸有五啜弩矢畢有五俟斤各有所部勝兵數

十萬並羈屬賀魯

其咄陸有五噉一日處月木昆律噉二日胡祿居闕噉賀

魯以女妻之三日攝舍提噉噉四日突騎賀羅

陀噉五日鼠泥陀處半噉弩矢畢有五侯斤一

日阿悉結闕侯斤最爲強盛二日哥舒闕侯斤

三日拔塞幹噉沙鉢侯斤四日阿悉結泥熟侯

斤五日哥舒

處半侯斤

西域諸國亦多附隸焉賀魯尋立

臣運爲賀咄葉護數侵擾西蕃諸部又進寇庭

州三年詔遣左武侯大將軍梁建方右騎衛大

將軍契苾何力率燕然都護所部同紇兵五萬

騎討之前後斬首九千級虜渠帥六十餘人四

年咄陸可汗死其子真珠葉護與五弩矢畢請

年咄陸可汗死其子真珠葉護與五弩矢畢請

年咄陸可汗死其子真珠葉護與五弩矢畢請

年咄陸可汗死其子真珠葉護與五弩矢畢請

年咄陸可汗死其子真珠葉護與五弩矢畢請

年咄陸可汗死其子真珠葉護與五弩矢畢請

擊賀魯破其牙帳斬首千餘級顯慶二年遣左屯衛將軍蘇定方燕然都護任雅相副都護蕭嗣業左驍衛大將軍瀚海都督回紇婆閭等率師討擊仍使右武衛大將軍阿史那彌射左屯衛大將軍阿史那步真持節爲安撫大使定方至曳咥河西賀魯率胡祿屋闕啜等二萬餘騎列陣而待定方率嗣業總管任雅相與之交戰賊眾大敗斬其大首領護都塔吐答達官等二百餘人賀魯及闕啜輕騎奔竄渡伊麗河兵馬



溺死者甚衆嗣業至千泉賀魯建牙之處彌射  
進軍伊麗水處密處月部落率衆來降彌射進  
次雙河賀魯先便步失達官鳩集散卒據柵拒  
戰彌射步真攻之大潰又與蘇定方攻賀魯於  
葉水大破之賀魯與咥運欲投鼠耨設至石國  
之蘇咄城傍人馬饑乏城主伊沮達官詐將酒  
食出迎賀魯信其言入城卽被拘執蕭嗣業旣  
至石國鼠耨設乃以賀魯及其屬俘至京師獻  
於昭陵及太社高宗特免死分其種落置崑陵

濛池二都護府其所役屬諸胡國皆分置州府  
西盡於波斯並隸安西都護府四年賀魯卒詔  
葬於頡利墓側刻石以紀其事

突騎施傳

臣秋濤謹案突騎施在碎葉西北亦近南俄羅斯部落故列於此

突騎施烏質勒者西突厥之別種也初隸在斛  
瑟羅下號爲莫賀達干後以斛瑟羅用法嚴酷  
擁衆背之尤能撫卹其部落由是爲遠近諸胡  
所歸附其下置部督二十員各統兵數千人常

屯聚碎葉西北界後漸攻陷碎葉徙其牙帳居之東北與突厥爲鄰西與諸胡國相接至庭州斛瑟羅以部衆削弱自武太后時入朝不敢還蕃其地並爲烏質勒所并及卒其長子娑葛代統其衆詔使立娑葛爲金河郡王仍賜以宮女四人初娑葛代父統兵烏質勒下部將闕啜忠節甚忌之以兵部尙書宗楚客當朝任勢密遣使齎金七百兩以賂楚客請停娑葛統兵楚客乃遣御史中丞馮嘉賓充使至其境陰與忠節

籌其事并自致書以申意在路爲娑葛遊兵所  
獲遂斬嘉賓仍進兵攻陷火燒等城遣使上表  
欲索楚客頭景隆三年娑葛弟遮弩恨所分部  
落少于其兄遂叛入突厥請爲鄉導以攻娑葛  
默啜乃留遮弩遣兵二萬人與其左右來攻娑  
葛遂擒娑葛以歸殺之默啜兵還娑葛下部將  
蘇祿鳩集餘衆自立爲可汗蘇祿者突騎施別  
種也頗善綏撫十姓部落漸歸附之有衆二十  
萬遂雄西域之地尋遣使來朝開元三年制授

蘇祿爲左羽林衛大將軍金方道經略大使特遣侍御史解忠順齎書冊立爲忠順可汗自是每年遣使朝獻上乃立史懷道女爲金河公主以妻之時杜暹爲安西都護公主遣牙官齎馬千疋詣安西互市使者宣公主教與暹暹曰阿史那氏女豈合宣教與吾節度使也杖其使者留而不遣其馬經寒雪盡死蘇祿大怒發兵分寇四鎮會暹入爲相趙頤貞代爲安西都護城中久乏由是四鎮貯積及人畜並爲蘇祿所

掠而去安西僅全俄又遣使入朝獻方物十八  
年蘇祿使至京師上御丹鳳樓設宴時突厥使  
與蘇祿使爭長遂於東西幕下兩處分坐突厥  
使在東突騎施使在西宴訖厚賚而遣蘇祿性  
尤清儉每戰所獲盡分與將士及諸部落其下  
愛之甚爲其用潛又遣使南通吐蕃東附突厥  
皆嫁女與之蘇祿旣以三國女爲可敦又分立  
數子爲葉護費用漸廣旣旣不爲積貯晚年抄  
掠所得者留不分之又因風病一手攣縮自是

其下諸部心始攜貳有大首領莫賀達干都摩  
度兩部最爲強盛百姓又分爲黃姓黑姓兩種  
互相猜阻二十六年莫賀達干勒兵夜攻蘇祿  
殺之都摩度初與莫賀達干連謀俄又相背立  
蘇祿之子吐火仙爲可汗以輯其餘衆與莫賀  
達干自相攻擊莫賀達干遣使告安西都護蓋  
嘉運嘉運率兵討之大破都摩度之衆臨陣擒  
吐火仙并收得金河公主而還又欲立史懷道  
之子昕爲可汗以鎮撫之莫賀達干不許曰討

平蘇祿本是我之原謀若立史昕爲主則國家  
何以賞於我乃不立史昕便令莫賀達干統衆  
二十七年嘉運率將士詣闕獻俘上御花萼樓  
以宴之仍命將吐火仙獻於太廟至德後黃姓  
黑姓各立可汗相攻中國方多故不暇治也代  
宗以後葛邏祿盛徙居碎葉川盡有碎葉怛羅  
斯諸城臣秋濤謹案怛羅斯  
卽俄羅斯始起地黃黑二姓皆臣屬  
焉然限同紇故不能自達於朝

### 驅度寐傳



驅度寐隋時聞焉在室韋之北其人甚長而衣  
短不索髮皆裹頭居土窟中唯有猪更無諸畜  
人輕捷一跳三丈餘又能立浮臥浮履水沒腰  
與陸走不別數乘大船至北室韋抄掠無甲冑  
以石爲矢鏃臣秋濤謹案此國在今俄羅斯甘  
查甲部濱大拉該海

拔悉彌傳

拔悉彌一名弊刺國隋時聞焉在北庭北海南  
結骨東南依山散居如燉煌九千餘里有渠帥

無王號戶二千餘其人雄健能射獵國多雪恒以木爲馬雪上逐鹿其狀似楯而頭高其下以馬皮順毛衣之令毛著雪而滑如着屨屐縛之足下若下阪走過奔鹿若平地履雪卽以杖刺地而走如船焉上阪卽手持之而登每獵得鹿將家室就而食之盡更移處其所居卽以樺皮爲舍丈夫剪髮樺皮爲帽

臣

秋濤謹案拔悉彌

一作拔悉密唐貞觀二十三年始來朝開元八

年王睢爲朔方道大總管奏請西徵拔悉密東

發奚契丹兩蕃期以明年秋掩突厥牙突厥謀  
臣燉欲谷曰拔悉密今在北庭與兩蕃東西相  
去絕遠勢必不合王駿兵馬亦必不能來拔悉  
密輕而好利必先至擊之可取也俄而拔悉密  
果引衆逼突厥牙知駿等不至乃引卻突厥欲  
擊之燉欲谷曰不如躡之距北庭二百里燉欲  
谷分兵閒道先掩北庭因縱擊拔悉密之衆悉  
擒之是拔悉密部距北庭最近也天寶初拔悉  
密與同紇葛邏祿並起兵攻突厥殺葉護可汗

突厥國人立判闕特勒子爲烏蘇米施可汗拔  
悉密等三部又攻殺之於是突厥大亂國人推  
拔悉密大酋阿史那施爲賀臘毗伽可汗遣使  
者朝唐元宗賜紫文袍金鈿帶魚袋不三歲回  
紇與葛邏祿合兵攻破之阿史那施奔北庭臣  
壽謹案突厥傳云回紇葛邏祿攻殺拔悉密可  
汗而拔悉密葛邏祿二傳皆云阿史那施出奔  
不言見殺後朝京師拜左武衛將軍拔悉密遂  
亡地與衆皆歸回紇是時回紇徙居突厥舊地  
旣併拔悉密復攻破葛邏祿收二部落之衆各

置都督一人每行止戰鬪以二客部落爲軍鋒云

臣

秋濤謹又案拔悉彌與駁馬同一種類故

唐書言駁馬亦名弊刺國一作曷刺其乘木馬

善射獵風俗並同但駁馬在結骨之北

見寰地字記

甚廣大而拔悉彌在結骨東南戶止二千其爲駁馬中分出一小部落明甚地在北庭之北海之南此所謂海當卽伊犁北之巴什噶爾泊拔悉彌居其南岸正當俄羅斯托穆斯科東南境也

### 流鬼傳

流鬼在北海之北北至夜叉國餘三面皆抵大  
海南去莫設韎鞮船行十五日無城郭依海島  
散居掘地深數尺兩邊斜豎木構爲屋人皆皮  
服又狗毛雜麻爲布而衣之婦人冬衣豕鹿皮  
夏衣魚皮制與獠同多沮澤有鹽魚之利地氣  
沍寒早霜雪每堅冰之後以木廣六寸長七尺  
施繫其上以踐屑冰逐及奔獸俗多狗勝兵萬  
餘人無相敬之禮官僚之法不識四時節序有  
他盜入境乃相呼召弓長四尺餘箭與中國同

以骨石爲鏃樂有歌舞死解封樹哭之三年無  
餘服制靺鞨有乘海至其國貨易陳國家之盛  
業於是其君長孟蟒遣其子可也余志以唐貞  
觀十四年三譯而來朝貢初至靺鞨不解乘馬  
上卽顛墜其長老人傳言其國北一月行有夜  
叉人皆豕牙翹出噉人莫有涉其界未嘗通聘  
臣秋濤謹案流鬼當卽今俄羅斯國東北境之  
岡札德加部亦名甘查甲部其國北行一月而  
至夜叉國當卽疇哥德部近北冰海之地與北

亞墨利加洲相近北亞墨利加洲舊俗殺人祭  
魔與所云夜叉國噉人之俗正同若豕牙翹出  
則因其噉人而附會耳

鐵勒傳

臣秋濤謹案鐵勒乃總名其各部  
落在俄羅斯境者俱分注於各部

之下

鐵勒之先匈奴之苗裔也種類最多自西海之

東依據山谷往往不絕獨洛河北有僕骨同羅

韋紇

臣秋濤謹案  
韋紇卽同紇

拔野古覆羅並號俟斤蒙陳

吐如紇期結渾斛薛等諸姓勝兵可二萬伊吾



以西焉耆之北傍白山則有契弊薄落職乙咥  
蘇婆那曷烏護骨紇也咥於尼護等勝兵可二  
萬金山西南有薛延陀咥勒兒十盤達契等萬  
餘兵康國北傍阿得水

臣秋濤謹案阿得水在俄羅斯境

則有

阿咥曷嶽撥忽吨干具海曷比悉阿嵯蘇拔也  
未渴達等三萬餘兵傍得疑海東西蘇路羯三  
索咽茂促薛忽等諸姓八千餘兵拂菻東則有  
思屈阿蘭北振九離伏唄昏等

唄烏沒翻

近二萬人

北海南則都波等雖姓氏各別總謂爲鐵勒並

有君長屬東西兩突厥隨水草流移人性兇忍  
善於騎射貪婪尤甚以寇掠爲生近西邊者頗  
爲藝植多牛羊而少馬突厥國有東西征討皆  
資其用以制北荒按十六國慕容垂時塞北後  
魏末河西並云有敕勒部鐵勒蓋言訛也隋大  
業元年突厥處羅可汗擊鐵勒諸部厚其稅歛  
又猜忌薛延陀等恐爲變遂集其魁帥數百人  
盡誅之由是一時反叛拒處羅遂立侯利發侯  
斤契弊歌楞爲易真莫何可汗居貪汗山復立

薛延陀內俟斤字也。吐爲小可汗處羅旣敗，莫何始大焉，甚得衆心，爲鄰國所憚。伊吾、高昌、焉耆諸國悉附之。其俗大抵與突厥同，唯丈夫婚畢，便就妻家待產乳男女，然後歸。此其異也。

薛延陀傳

臣秋濤謹案突厥之地薛延陀盡得之，其北跨俄羅斯界。

薛延陀者，先與薛種雜居，後滅延陀，有之號薛延陀。姓一利咥氏，風俗大抵與突厥同，保燕末山。其主夷南率部帳七萬附頡利可汗。後突厥衰，夷男反攻頡利弱之。於是諸性多叛頡利歸。

之者唐太宗方圖頡利冊拜夷男爲眞珠毗伽  
可汗乃樹牙鬱督軍山直京師西北六千里東  
靺鞨西葉護突厥南沙磧北俱倫水地大衆附  
頡利之滅夷男率其部稍東保都尉健山獨邏  
水之陰遠京師纔三千里而羸東室韋西金山  
南突厥北瀚海蓋古匈奴地也勝兵二十萬以  
二子大度設突利失分將之號南北部太宗以  
李思摩爲可汗夷男惡之使大度設勒兵二十  
萬南絕漠壁白道川擊思摩思摩走朔州言狀

於是詔營州都督張儉統所部與奚霫契丹乘其東朔州道行軍總管李勣衆六萬騎三千營朔州靈州道行軍總管李大亮衆四萬騎五千屯靈武慶州道行軍總管張士貴衆萬七千出雲中涼州道行軍總管李襲譽經略之大度設次長城會勣兵至行壩屬天遽率衆走赤柯度青山勣選敢死士與突騎經臘河趨白道大度設顧不脫度諾眞水陳以待勣擣其罅虜潰斬首數千級獲馬萬五千大度設亡去殘卒奔漠

北俄爲同紇所屠其昆弟子咄摩支立爲可汗  
遣使者上言願保鬱督軍山帝詔勣等曰降則  
撫之叛者擊之咄摩支陰欲拒戰外爲好言乞  
降勣知之縱兵擊斬五千餘級繫老稚三萬遂  
滅其國

同紇傳

臣秋濤謹案同紇舊國在今俄羅斯境

同紇其先匈奴也舊國在薛延陀北境居延婆  
陵水去長安萬六千九百里元魏時亦號高車  
部或曰勣勒訛爲鐵勒至隋臣於突厥大業中

處羅可汗攻脅鐵勒部哀責其財既又恐其怨  
則集渠豪數百悉阬之乃叛去自爲俟斤稱回  
紇姓藥羅葛氏有時健俟斤者衆始推爲君長  
子曰菩薩材勇有謀與薛延陀共攻突厥北邊  
頡利遣欲谷設領騎萬人討之菩薩身將五千  
騎破之馬鬣山追北至天山大俘其部人聲震  
北方繇是附薛延陀相唇齒號活頡利發樹牙  
獨樂水上

臣秋濤謹案獨樂水卽今土拉河也

自突厥衰滅其國

漸盛國主亦號可汗貞觀二十一年內附薛延

陀旣亡其故地悉爲回紇所有龍朔三年移燕  
然都護府於回紇部落仍改名瀚海都護府以  
磧爲界大抵北蕃悉隸之天寶初裴羅助拔悉  
密擊走烏蘇可汗後三年襲破拔悉密南居突  
厥故地徙牙烏德韃山昆河之間南距西城千  
七百里西城漢高闕塞也北盡磧口三百里明  
年裴羅又攻殺突厥白眉可汗斥地愈廣東極  
室韋西金山南空大漠盡得古匈奴地至德初  
出兵助國討平安史之亂故累朝恩禮最重然



恃功橫恣朝廷雖患其邀求無厭頗姑息聽從  
之元和中改爲同鶻會昌中其國衰亂爲黠戛  
斯所攻其相馭職與龐特勒十五部奔葛邏祿  
殘衆入吐蕃安西於是可汗牙部十三姓奉烏  
介特勒爲可汗南保錯之山旣而爲幽州張仲  
武所破滅龐特勒自稱可汗居甘沙西州無復  
昔時之盛矣臣秋濤謹案同紇自薛延陀滅後  
徙牙帳於烏德鞬山居昆河之間南距西受降  
城千七百里唐書地理志中受降城正北如東

八十里有呼延谷又五百里至鷓鴣泉又十里  
入磧經麋鹿山鹿耳山錯甲山八百里至山鷲  
子井又西北經密粟山達旦泊野馬泊可汗泉  
橫嶺綿泉鏡泊七百里至回鶻衙帳東有平野  
西據烏德鞬山南依噠昆水北六七百里至仙  
娥河烏德鞬山左右噠昆河獨邏河皆屈曲東  
北流至衙帳東北五百里合流此其後徙居處  
也距長安僅三千三百餘里若其始居薛延陀  
北境延婆陵水去長安萬六千九百里當在今

俄羅斯國北境近北海處

僕骨傳

僕骨鐵勒之別部習俗與突厥略同在多濫葛東境勝兵萬餘與同羅宿敦鄰好最居北偏先臣於頡利苦頡利亂政後附薛延陀太宗貞觀中遣使朝貢及延陀之滅也其大酋婆匐侯利發歌藍伏延詣闕內附太宗以其地爲金微都督府拜酋長爲都督臣秋濤謹案僕骨部入中國亦作僕固氏僕固懷恩卽其胄也以地勢診

之當在今肯特山北楚庫河附近僕骨卽楚庫之音轉也

同羅傳

同羅者鐵勒之別部也在薛延陁之北去長安萬七千五百里戶萬五千俗與突厥略同初臣突厥苦頡利之政亂太宗時其酋俟利發時健啜遣使內附以其地爲龜林都督府拜其酋長爲都督中間無聞洎天寶初其酋帥阿布思以萬餘帳來降處之朔方河南之地給其廩食每

歲仍費繕絮數十萬段其河曲郡縣倉廩爲之  
空虛至十年背叛劫掠諸姓部落遂還漠北爲  
回紇所破黨衆離散阿布思後奔葛羅祿北庭  
節度程千里購之以獻戮於京師臣秋濤謹案  
此國卽今俄羅斯冬古薩河旁地其居民今尙  
稱通古斯族一曰儻俄斯族卽同羅音轉也

都波傳

都波者鐵勒別種南去回紇十三日行

臣秋濤謹案唐

書云骨利幹西行十三日至都分爲三部自相  
播此云南去回紇十三日恐誤

統攝結草爲廬無牛羊不知耕稼土多百合草  
取其根以爲糧兼捕魚射獵爲食而衣貂鹿之  
皮貧者緝鳥羽以爲服婚姻富者以馬貧用鹿  
皮及草根爲聘禮死亡以木櫃盛尸置山中或  
懸於樹上送葬哭泣略與突厥類莫知四時之  
候國無刑罰偷盜倍徵其贖唐貞觀二十一年  
遣使朝貢後役屬於黠戛斯臣秋濤謹按此國  
卽今俄羅斯德波斯科之地

### 拔野古傳

拔野古者亦鐵勒之別部在僕骨東境勝兵萬餘其地豐草盛人皆殷富其酋俟利發屈利失貞觀二十一年舉其部來降太宗以其地爲幽陵都督府拜其酋長爲都督其地東北千有餘里曰康干河有松木入水二年乃化爲石其色青有國人居住其人謂之康干石其松爲石以後仍似松文人皆着木腳冰上逐鹿以耕種射獵爲業國多好馬又出鐵風俗與鐵勒同言語稍別

臣

秋濤謹案此國卽今俄羅斯國巴爾古

錫穆城地

多濫葛傳

多濫葛在薛延陀東界居近同羅水勝兵萬人  
自古未通中國其大酋俟斤多濫葛於貞觀二  
十一年率所部朝見太宗以其地爲燕然都督  
府拜其酋爲都督臣秋濤謹案同羅水當卽今  
俄羅斯境之通古斯河河旁有多羅三色古城  
疑卽古多濫葛國地

斛薛傳



斛薛亦鐵勒之別部在多濫葛北境兩姓合居  
勝兵七千貞觀二十一年舉部內附以爲高闕  
州拜其酋長爲刺史臣秋濤謹案今俄羅斯北  
境多羅三色吉城北有烏伯河當卽此國舊壤

### 阿跋傳

阿跋亦鐵勒之別部在多濫葛西北勝兵千七  
百隋代號訶陁部是也遷徙無常所舊唐書作  
阿跌部貞觀二十一年舉部內附以阿跌部爲  
雞田州拜其酋長爲刺史臣秋濤謹案今俄羅

斯境有薩達里莽阿斯城當卽此國

鞠國傳

鞠國在拔野古東北五百里六日行至其國有樹無草但有地苔無羊馬家畜鹿如中國牛馬使鹿牽車可勝三四人衣鹿皮食地苔其國俗聚木爲屋尊卑共居其中貞觀二十一年通中國臣秋濤謹案此國當卽今俄羅斯國義爾古德斯科地

俞杌傳

臣秋濤謹案新唐書作俞折

俞柅國在鞠國東十五日行其土地寬大百姓  
衆多風俗與拔野古同少牛馬多貂鼠貞觀二  
十一年通中國臣秋濤謹案此國當卽今俄羅  
斯國雅庫斯科部南境外興安嶺以北地

### 大漢傳

大漢國在鞠國北饒牛馬人極長大長者至丈  
三四尺問其國云北有骨師國共大漢相接貞  
觀二十一年通中國臣秋濤謹案此國當卽今  
俄羅斯國土爾汗之地新唐書曰大漢與鞠俱

鄰於黠戛斯劔海之瀕劔海蓋卽劔水所瀦之  
泊也

白霄傳

白霄在拔野古東勝兵三千人其渠帥貞觀二  
十一年率其所部歸附太宗以其地爲賓顏州  
拜其酋長爲刺史臣秋濤謹案此國當在今尼  
布楚城以北俄羅斯境

骨利幹傳

骨利幹居迴紇北方瀚海之北二俟斤同居勝

兵四千五百人草多百合地出名馬頭類橐駝  
筋骨粗壯好者日行數百里其地北距海去京  
師最遠又北度海則晝長夜短日沒後天色正  
曠煮一羊胛纔熟而東方已曙蓋近日入出之

所臣秋濤謹案煮羊胛事乃指骨利幹之北海  
島非卽謂骨利幹本國也通典所載語多未

晰今從唐太宗貞觀二十一年骨利幹遣使朝  
新唐書

貢太宗遣雲麾將軍康蘇密往慰撫之仍列其  
地爲元闕州俄又遣使隨蘇密入朝獻良馬十  
匹太宗奇其駿異爲之制名號爲十驥一曰騰

霜白二曰皎雪驄三曰凝露驄四曰懸光驄五  
曰決波驄六曰飛霞驄七曰發電赤八曰流金  
駟九曰翺麟紫十曰奔虹赤又爲文以敘其事  
臣秋濤謹案此國當卽今俄羅斯國伊聶謝斯  
科部地

結骨傳

結骨在迴紇西北三千里勝兵八萬其國南阻  
貪漫山多林木夏沮洳冬積雪往來險阻有水  
從迴紇北流踰山逕其人並依山而居身悉長

大赤色朱髮綠睛有黑髮者以爲不祥人皆勁  
勇鄰國憚之丈夫健者悉黥以爲異婦人嫁訖  
自耳以下至項亦黥之其人服飾以貂貉食用  
手其俗大率與突厥同婚姻無財聘性多淫佚  
與外人通者不忌男女雜處每一姓或千口五  
百口共一屋一床一被若死唯哭三聲不斂面  
火葬收其骨逾年而爲墳墓以木爲室覆以木  
皮土宜菽麥稭豆之屬無果菜有馬出貂天每  
雨鐵收而用之號曰伽沙以爲刀劍甚銛利其

國獵獸皆乘木升降山陞追赴若飛唐貞觀二十一年其君長遂身入朝臣秋濤謹案結骨國後改黠戛斯當在今阿勒坦山之北卽俄羅斯國之托穆斯科等部地夏沮洳冬積雪據圖理琛異域錄敘之甚詳

### 駃馬傳

駃馬其地近北海去長安萬四千里經突厥大部落五所乃至焉有兵三萬人馬三十萬匹其國以俟斤統領與突厥不殊有弓箭刀稍傍排



無宿衛隊仗不行賞賜其土境東西一月行南  
北五十日行土地嚴寒每冬積雪樹木不沒者  
纔一二尺至煖消逐陽坡以馬及人挽犁種五  
穀好漁獵取魚鹿獺貂鼠等肉充食以其皮爲  
衣少鐵器用陶瓦釜及樺皮根爲盤盥隨水草  
居止累木如井欄樺皮蓋以爲屋土牀草蓐如  
氍毹而寢處之草盡卽移居無定所馬色並駁故  
以名云其馬不乘但取其乳酪充食而已與結  
骨數相侵伐貌類結骨而言語不相通唐高宗

永徽中遣使朝貢突厥謂駁馬爲曷刺亦名曷  
刺國又作弊刺臣秋濤謹案駁馬國當卽今俄  
羅斯郭列穆斯科部地

### 鬼國傳

鬼國在駁馬國西六十日行其國夜游晝隱身  
著渾剝鹿皮衣服鼻耳與中國人同口在頂上  
食用瓦器土無米粟噉鹿豕及蛇臣秋濤謹案  
此國以道里計之當在俄羅斯白海之濱然今  
不聞有口在頂上之異恐唐書所記或傳聞失

實也

鹽漠念傳

駁馬國南三十日行至突騎施三十日行至鹽漠念咄陸闕俟斤部落又北八日行至可史擔部落其駁馬鹽漠念無牛羊雜畜婚姻嫁娶與突厥同土多松樺樹每年稅貂獺青白二鼠皮以奉酋長

臣

秋濤謹案此部當在今俄羅斯境

大食傳

大食國本在波斯之西隋大業中有波斯牧駝

胡人於俱紛摩地那之山糾衆起兵渡恒曷水  
劫奪商旅其衆漸盛遂割據波斯西境自立爲  
王波斯拂菻各遣兵討之皆爲所敗永徽二年  
始遣使朝貢其姓大食氏名噉密莫末膩自云  
有國已三十四年厯三主矣其國男子色黑多  
鬚鼻大而長似婆羅門婦人白皙亦有文字出  
駝馬大於諸國兵刃勁利其俗勇於戰鬥好事  
天神土多沙石不堪耕種唯食駝馬等肉俱紛  
摩地那山在國之西南鄰於大海龍朔初擊破

波斯又破拂菻始有米麴之屬又將兵南侵婆  
羅門吞併諸國勝兵四十餘萬長安中遣使獻  
良馬景雲二年又獻方物開元初遣使來朝進  
馬及寶鈿帶等方物其使謁見唯平立不拜憲  
司欲糾之中書令張說奏曰大食殊俗慕義遠  
來不可寘罪上特許之尋又遣使朝獻自云在  
本國惟拜天神雖見王亦無致拜之法所司屢  
詰責之其使遂請依漢法致拜其時西域康國  
石國之類皆臣屬之其境東西萬里東與突騎

施相接焉一云隋開皇中大食族中有孤列種  
代爲酋長孤列種中又有兩姓一號盆泥奚深  
一號盆泥末換其奚深後有摩訶末者勇健多  
智衆立之爲主東西征伐開地三千里兼尅夏  
臘一名釤城釤音所鑒翻摩訶末後十四代至末換  
末換殺其兄伊疾而自立復殘忍其下怨之有  
呼羅珊木粗人並波悉林舉義兵應者悉令著  
黑衣旬月間衆盈數萬鼓行而西生擒末換殺  
之遂求得奚深種阿蒲羅拔立之末換已前謂

之白衣大食自阿蒲羅拔後改爲黑衣大食阿蒲羅拔卒立其弟阿蒲恭拂至德初遣使朝貢代宗時爲元帥亦用其國兵以收兩都寶應大厯中頻遣使來恭拂卒子迷地立迷地卒子卒栖立卒栖卒其弟訶論立貞元中與吐蕃爲勦敵蕃軍大半西禦大食故鮮爲邊患其力不足也臣秋濤謹案波斯距長安一萬五千里大食又在其西其時吐蕃陷安西北庭唐通大食蓋北出同紇西徑黠戛斯今俄羅斯裏海以北道

也大食盛時併石國康國直接堅昆卽南戔數  
部地皆在其囊括中矣唐與吐蕃爲敵而西結  
二萬里外之大食卒獲其力以制強鄰然則謀  
國者其可忽於遠圖哉



朔方備乘卷三十二

朔方備乘卷三十二

知縣林穗初校  
知縣吳壽坤覆校